



TOMANATUGA FA'ALEAGAGA.

MATI 2023

MATAUPU: I LUGA OLE MAUGA

TUSI FAITAU: MATAIO 17:1-9

Mati - 2023

**MATUA:** “*Ua ia ava'e ia te i latou ile mauga maualuga ua na'o i latou lava, ua pupula mai ona fofoga e pei ole la*”.

*Ile suafa mamalu o le Atua tasitolu Paia, ma te toe ofo alofa ma toe fa'atalofa atu ai fo'i ile Paia ma le mamalu maualuga ole tatou Kapelenisia Samoa, mai lava i ou tumutumu mauga, seia pa'ia fanua-alalo. Malo le lagi soifua, faafetai le onosa'i ma le faatoatoa i lo tatou valaauina. Malo tautua lelei mo le Ali'i.*

*O lea fo'i ua mau i ifo galu fatio'o, o mala ma puapuaga o lena masina ua mou atu. A'o le alofa matalasi ole Mata'isau o mea uma, lea ua tatou siva ai nei fo'i i lagi tau, ae sa'a i ma'omalie. Ma o lona vi'iga silisili lea. Tatou ailao ua maua, e pei o la le fai Salamo “ E lelei, e lelei, e lelei le Atua “*

*Ae alo maia, o se tomanatuga faaleagaga fo'i lenei mo i tatou mo lenei fo'i masina o Mati, aemaise le tatou malaga fa'alefa'atuatua i lenei vaitau Pa'ia “Le Fagafulu”.*

*E le'i aveva uma e Iesu le to'a 12 i luga ole mauga, e na'o le to'a 3 na ave. Ae e le'i fa'ato'ese fo'i pe fa'amaulalo o ia ile isi to'a 9 na tu'u i lalo ole fanua laugatasi. O lona finagalo, e le o tagata uma e o ile tumutumu mauga, ole to'a tele e tatau ona i le mea laugatasi o fai ai le galuega auauna. (14-21) O lona uiga, e le o tagata uma e fai ma ta'ita'i, po'o fa'auhuuluga. E tutusa le alofa o Iesu ia i tatou uma, peita'i e le tutusa tiute ma faiva na te tofofi i ai oe ma a'u ma i tatou uma, e le tutusa uma fo'i auala na te fa'aoga i ai i tatou, ma auala e fesootai mai ai o ia ia te'i tatou ta'i to'a tasi. A'o le mea taua mo i tatou le au uso e, ina ia tatou malilie ma talia tofiga e fai e Iesu, o ia e pule, ae le o i tatou.*

*E le fa'apea a o'o loa i luga ole tumutumu mauga ona iloa lea ua e ma'oa'e ma maualuga se agava'a ma se atamai, ua mafua ai ona tofi e Iesu, e leai. Ina ua liliu'eseina Iesu ona fai mai lea o Peteru, “Ou te faia i'inei ni faleapitaga se tolu;” Oka se manuia ole manatu o Peteru, ae o se manatu ua valea ma sese tele; e mafua, ona ua i luga loa ole mea maualuga, le mauga, 'ona so'ona lalafo loa lea, ua so'ona sa'oloto e tautala, ae le se'i fa'atali, se'i fetalai muamua Iesu ile mea e tatau ona fai. O lona uiga, mo e ua i luga o le mea maualuga, luga ole mauga, se se'i fa'autauta, se lotomaualalo ma faatali te'isi, se'i fetalai mai Iesu, tu'u pea i le ta'ita'i ga a Iesu.*

*Ole a le faamoemoe tatou te o ai i luga ole mauga? Tatou te o se'i fa'alauiloa Iesu, ae le o Peteru, po'o Ioane, po'o Iakopo, ia po'o i tatou fo'i. “O lo'u atalii pele lena, ou te fiafia ia te ia; ia outou fa'alogalo ia te ia..” O se a'oa'oga lenei e fia faamanatu pea ia i tatou, aua e fa'asoosoina i tatou pe a o'o ile tumutumu mauga, e faagalo vave Iesu ae fa'amuamua i tatou. O se lu'itau tele mo i tatou le o'o i nofoaga ma tulaga maualuluga, ma iloa le silisili 'ese o Iesu, ma tatou fa'apa'u fao i ona luma.*

Ina ua toe talii ifo Iesu ma le to'a 3 nai le mauga na liliu'eseina ai le Ali'i, ona latou fetaia'i lea ma le taule'ale'a talavou na pa'u so'o ile afi ma le vai. Na fai ane fo'i lona Tama ia Iesu, “Na ou aumai ia te ia i ou so'o, a ua latou le mafaia ona fa'amalolo ia te ia.” ‘ona tuli 'ese lea e Iesu ole temoni, ma fa'amalolo ile talavou. O nisi a'oa'oga taua mai lenei vaega ole tala:

*O a tatou fe'umia'iga ma Iesu i tulaga maualuluga, ole saunia lea o'i tatou mo fetaia'iga ma le fili o faatalitali mai ile laugatasi. Afai tatou te le malamalama pe mataala i lea tulaga, ole a tatou fa'aletonu pe afai e fetai ma lu'i tetele o i luma. Ia fa'amasani e o ma Iesu i luga ole mauga, i la'asaga maualuluga ole ola faaleagaga ma le mafutaga lilo ma ia.*

*Ole tofi ma le tiute ua valaauina i ai i tatou, ole galuega fesoasoani e lavea'i ma fa'aola mai tagata aemaise i latou o pau'u so'o i vai ma afi e fano ai. E le lava le fa'apea o'i tatou o so'o o Keriso po'o kerisiano e to'aga i lotu, mata'ala ua malolosi tele a'uuega a le fili ma ua le toe faigofie ona ila i auala masani. E le'i mafaia e le au so'o ona fa'atili le atalii talavou, ona ole vaivai ole ola tatalo ma le fa'atuatua ile Ali'i. “A ua na ole tatalo ma le anapogi e o 'ese ai mea fa'apena”. Le au pele, ia si'itia i luga le tulaga ole tatou ola fa'atuatua ma le tatalo, e maua ai le paoa o Iesu. Tatou tatalo ina ia tatou maua lena meaalofo, le paoa po'o le malosi lilo faaleagaga o Iesu e fesoasoani i la tatou savaliga i lenei vaitausaga ole Fagafulu.*

*Le au uso e, le tatou Kapelenisia e, e le o luga ole Mauga ma mea maualuluga na sa'ili ai e Iesu lona faaeaina, a'o lalo. Leitioa upu a le Atunuu, “O lalo lava e sa'ili i ai malo.” I lenei Fagafulu, tatou o i luga faaleagaga se'i tau ina sulugiaina lo tatou pogisa ile “Pupula o ona fofoga”, ona tatou toe fo'i lea i lalo ile laugatasi e faatinoina atili jeau e tusa o lo tatou valaauina. Faamafola atu o tatou lima mo i latou o matitiva ma puapuagatia, maua le loto Salamo mai o tatou sese ma a mea ua sala ma va ai pea foga'a ile va ma le Atua aemaise le uso tagata.*

*Manuia tele le faigamalaga faaleagaga i lenei vaitausaga ole Fagafulu.*

*Ia Manuia ona o Keriso, o a outou auauna ia Keriso*

*Tatou tatalo: “Le Ali'i e, ia i luga ia te'i matou lou alofa, e pei ona matou fa'amoemoe ia te oe”*

*Amene.*

*Vauei & Veronika Tolova'a*

*(FKS)*

## AFIOGA KATINALE JOHN DEW



9 Fepuari 2023

O le to’atele o outou ua iloaina e i ai se fa’amoemoe a Pope Faranisisi mo se tatalo i masina ta’itasi. O ana tatalo sa fuafuaina mo Fepuari ua talosaga ai i palisi ina ia agalelei ma tatala atu, avea ma fa’apopotoga o le fa’atuatua, usoga ma fa’aulufale mai latou ua tele le mana’omia.

I se fa’aaliga i luga o tafa’ilagi e uiga i ana fuafuaga mo tatalo ia Fepuari na fa’amamafa mai e Pope Faranisisi le ta’ua o palisi. O lenei fa’asalalauga na amata i se fa’atusa o se va’aiga i fafo o se falesa palisi matagofie ae leai nisi i totonu, mulimuli mai ai lenā lava falesa ua tumu i tagata. Sa fai mai o ia, **“Fa’amolemole, ia tatou lototetele. Ia tatou toe manatunatu i le ituaiiga o a tatou fa’apopotoga e maumaututū, ina ia avea i latou o ni fa’apopotoga o le fa’atuatua, o le usoga ma le fa’aulufale mai o latou e i ai le mana’omia tele.”**

I lana tusitusiga *Evangelii Gaudium*, na lomina i le amataga o lana nofoa’iga, na fa’ailoa mai e Pope Faranisisi le totonugalemū o le palisi ma na fai mai o le palisi **“o le Ekalesia o lo’o ola ai i le ogatotonu o aiga o ana atali’i ma afafine.”** O le mafua’aga lea e ao ai ona, e pei ona ia fai mai ai **“feso’ota’i ma aiga ma olaga o ona tagata”** ma aua ne’i avea “o se fa’atulagaga e lē aogā e leai se feso’ota’iga ma tagata po o se kulupu ua manatu- fa’apito iā i latou lava ua fausia mai na o le toaititi o latou ua filifilia.”

O se mea matagofie o le to’atele ua i ai fa’amoemoe ma miti o tulaga e tatau ona i ai a latou palisi: fa’aulufale mai, olaga tatalo, ‘au’auna atu ma tausi atu i isi, o lauga e fa’aosofiaina, o pesepesega lelei, ma mea fa’apena. E mafai ona avea ma se lisi e umi tele.

O nisi o taimi e fa’amoemoe tagata o nei fa’amoemoe ma miti o le a fa’ataunu’uina e le ositaulaga, ae o le moni lava o le tasi po o le lua o ni faife’au i se palisi e lē mafai ona faia mea uma.

O le isi taimi ina ua talanoa mai Pope Faranisisi e uiga i palisi sa ia fa’apea mai”... e tatau ona avea o ni fa’apopotoga, e autū i tagata, ona o tatou o ni fa’apopotoga moni pe tatou te iloaina le tasi ma le isi, iloaina igoa o isi, mana’oga ma leo. E fa’afia i nisi o taimi ua avea palisi o se kulupu o tagata e lē masani ua na ona feiloa’i i Misasa i aso Sa, ae leai se olaga fa’apopotoga...”

O masina i luma e mafai ona tatou faia tatalo a Pope Faranisisi o a tatou mana’oga. Ia tatou tatalo mo palisi uma i se auala fa’apitoa e pei ona fai mai Pope Faranisisi: “Ia tatou tatalo mo palisi, tu’uina atu le tu’ufa’atasiga – tu’ufa’atasiga o tagata, fa’atasiga fa’aekalesia – i le ogatotonu, ina ia fa’ateleina le avea ma fa’apopotoga o le fa’atuatua, fa’aleuso ma fa’aulufale mai i latou ua sili le mana’omia.”

Ma fa’amanuiaga uma lava

- Ioane

## FONOTAGA A EPIKOPO OSEANIA O SE “FIAFIAGA TELE”

Ua a’afia ai le fa’alogologo o le tasi i le isi ina ia tatou talanoa fa’atasi i se leo manino ma Tautala atu i le Ekalesia atoa i le lalolagi,” fai mai ai Coleridge.

“Ae i le fatu o lenā, o lo’o i ai le pisinisi fa’atelosia, fa’aoga mafua’aga i le fa’atuatua i se auala e faia ai le mea tonu i le poto masani a tagata o le Pasefika.”

### Tausiga o le Vasa

Na fai mai epikopo i la latou fa’atalanoaga o le moana na a’afia ai le a’afiaga o le si’isi’i ae o le loloto o le sami ma su’eina o alamanuia, aga’i atu i le tausiga lelei o le moana. I la tatou itulagi, o le fa’alavelave fa’asi’osi’omaga o se fa’amata’u o lo’o i ai nei mo tatou tagata ma fa’apopotoga” ma o lo’o fa’aalia i auala ‘ese’ese, a’afia ai ma le

## FONOTAGA A EPIKOPO OSEANIA O SE “FIAFIAGA TELE”

si'isi'i a'e o le sami, fa'availa'auina o le sami, lamala, mamafa o timuga ma “tau ua sili atu le maolosi.” Mo lenei mafua'aga, ua fai ma ii latou o se “si'osi'omaga liua o se misiona fa'amuumua fa'avavevave e le gata mo tatou, ae mo le Ekalesia atoa.”

### Fa'asinoti

O le avea ma Ekalesia fa'asinoti ma tapenaga mo tala'iga o popolega taūa i Koneferenesi uma a le Oseania. I lenei faiga o fa'aupuga fa'ai'u a le Fa'apopotoga:

“Oseania o le aiga mo nisi o ekalesia talavou a le lalolagi ma fa'apea fo'i le aganu'u aupito le matua o lo'o fa'auau i le lalolagi.

“Tatou te talisapaia le lavelave fa'aonapo nei a le lalolagi... O le va'aia e talavou e aofia ai le fa'aletonu, ae ua ofoina mai ai fo'i se fou ma le malosi.”

O le fa'aupuga ua ta'uta'u atu ai “e ekalesia aupito talavou i o tatou itulagi e i ai lesona e a'oa'o atu i ekalesia ua maumautū e uiga i le fa'asinoti ma le taofiofia o le felesi o le feiloa'iga a le Evagelia ma aganu'u ma sosaiete.”

## FA'AFETAI I LE KAPELANISIA



O le a ou lē toe asaasaina le vao filifili, pe folau i iu o matagi i ou Paia sausaugatā Samoa, o oe o le i'a iviivia, e leai se tautai na te toe auauina, tulou, e le toe tausulaina o ie memea i ou mamalu faaete gatā. Aua o le fale o po ma ao ua so'o lona ta'iao e tulutulu fo'i i Tao. Ae fa'ata'alolo ia o paia o le atunu'u. Ao mamalu o le tala lelei fa'alepa ia i feoi taulagi, i fata faitaulaga ese'ese, e nonomanū auā so tatou manuia. E le mafai ona galo Afia isi ona vao i le agaga fa'afetai. O le mea moni, sa natia lou silafia i so'u tama meamea i le galuega, ae fa'atau- mua'ava le fetu'una'iga fa'amunia o le tofa ma lau fa'autaga, ina ia manuia le galuega, aua le Kapelania mo a taeao. Fa'afetai i fautuaga na afua ai ona maua manatu, e palepale a'i le alafua o lenei galuega. Sa ou asamo fa'alumaga i le Atua, sa tali lumafale i lo'u vaivai ma le lē mau manatu, a lea ua uluulu matafolau le fa'asoa a le silisili 'ese ae tauia ina ou ui atu i le ala o le sao, ma momoli fa'ava'a e ofi i le ava se fa'afetai tau utiuti i lana afioga Katinale John Dew mo lana fa'atuatuga na tu'uina mai ia te a'u, o lana lagolagosua ma lona alofa mo tagata Samoa. Fa'afetai atu fo'i

i le afioga Patele Mauga mo lana fesoaoani, ta'ita'iga ma lona alofa, na toe fo'i mai lana faigamalologa e fesoaoani i le galuega, e le'i i ai se iloa ma se poto masani, ona o lo outou masui. Manatua fo'i le ituaigasa i la outou lagolagosua ma le fesoaoani ina ia maua e le tatou Kapelania Misasa Samoa. O le fa'afetai le lava i le tatou Kaplenisia, ona o la tatou mafutaga, sa tatou faimalaga mai ai i nei tausaga e tele. Fa'afetai i la outou lagolagosua, fesoasoani, faufautua, aemaise la outou tautua lotu na faigofie ai la tatou faigamalaga aga'i i luma, fa'afetai, fa'afetai, fa'afetai tele lava. O le ulufia o outou 'a'ao, ma le gase o outou finagalo tama'alii. E tau natia ma le laina, sa tu ma tilotilo lo'u tagata nei, pe aga i fea sa'u tautua. Sa gase le pa'a i ona lava vae, ini manatu le mautonu, a lea ua tala leo malie lau tapuaiga, e pei o le igoa o le alo o le Tuiatua o lea ua masina atoa e pei o le igoaipu o le vai magalo. E tu foi i le to ae maniti tino i pisaga, aua le paia maualuga i nai o'u aiga i la latou fo'i tapuaiga.

Ia alofagia e le Atua ma sasa'a mai ana fa'amanuiaga i lana afioga Katinale John Dew aua le ta'ita'iina o la tatou Pule'aga. Fa'amanuia le Atua i le au ositaulaga aua fo'i la latou au'aunaga o lo'o feagai ma i latou. Fa'amanuia le Atua i le tatou Kapelania, i Ekalesia ta'itasi aemaise aiga uma ma a outou fanau.

Soifua

Salā Mikaele Teofilo

# O OSITaulaga o leoleo mamoe, e lē o ni pule!

(Tusia e Cardinal Gèrald Cyprien Lacroix o Quebec)

O Katinale Gèrald Cyprien Lacroix o Quebec sa fa'apea mai o faife'au e tatau ona gaioi o ni leoleo mamoe ae lē o ni pule e fesoasoani i o latou tagata ina ia ola ai i se mafutaga ma Iesu. O lenei ali'i o Lacroix sa faia lenei tautalaga i se fonotaga ae le'i faia se fonotaga mo le tolu aso i le Vatikano e va'ai pe fa'apefea ona fa'aleleia atili le galulue fa'atasi o tagatā lotu, ositaulaga ma epikopo. E mana'o Lacroix i ositaulaga e maitauina o tagatā lotu e lē o ni 'au'auna iā i latou.

“Ua tatou i ai i'ina fa'atasi i le 'au'aunaga a le Ekalesia” fai mai ai o ia. Na fai mai Lacroix o faife'au e tatau ona vala'auina tagatā lotu i galuega fai a palisi ma polokalame, ae e tatau fo'i ona fesiligia i latou pe fa'apefea ona latou lagolagoina tagata palisi i tulaga ua latou i ai nei. Fai mai o ia o olaga masani a tagata i aso ta'itasi o vaega ia o le pa'iaga, ma e mana'o i faife'au e lagolago iā i latou i o latou olaga.

Fai mai o ia, “O le a la tatou matafaioi o ni faife'au ma epikopo i lenei malaga matagofie?” O la tatou matafaioi muamua o ni faife'au. E le o ni fa'atonu sili; e le o tatou o ni pule: o tatou o faife'au, o leoleo mamoe.”

Na fa'apea mai Lacroix e mana'omia e le Ekalesia “a'oa'oga lelei, le maitauina lelei ma le tele o galuega” e aumaia le va'ai agai atu i fua lelei. Sa ia manatuaina le taimi ae le'i avea o ia ma faife'au ina ua ia avatu se fautuaga i faife'au: “taofiofi le vala'auina o tagata e o mai i fa'atasiga

a faife'au. Maitauina o nisi o tagata o lo'o i a'oga, galuega ma e mana'omia le avea ma so'o lelei i'inā.” O lenei fa'atasiga sa ta'ua “O Faife'au ma Le Au Fa'atuatua Ua Vala'auina Fa'atasi,” ma na fa'amaopopoina e le Kuria a le Vatikano mo Tagata Lotu, Aiga ma le Ola, na fa'auluuluina e Katinale Kevin Farrel.

“E tele atu mea e mafai ona ofoina atu e tagatā lotu i lo na o ni matafaioi ua mafai ona latou fa'atinoina. E taūa tele le 'auna ne'i o tatou fa'aitiitia le matafaioi a tagata lotu i le Ekalesia ua na o se patipatia o sauniga po na o se a'afiaga. O tagata lotu ua le na ona aoina o le mealofa i Misasa i aso Sa. E tatau ona latou a'afia i le tele o nisi o matafaioi.

Na fa'amatalaina e Katinale Farrell o le matafaioi a tagata lotu i le Ekalesia e mana'omia “se suiga o le loto, se suiga o uiga.” Na fa'apea mai o ia “e tatau ona tatou o atu i se malamalama'aga loloto i le uiga o le matafaioi fai fa'atasi mo le ola ole Ekalesia.” O lenei malamalama'aga e mana'omia “se galuega tele”. Na fa'amamafa mai fo'i e Farrell “ona o Katoliko ua uma ona papatisoina, o tatou uma e i ai le tiute tauave mo le Ekalesia.”

Ina ua fai mai Keriso, “O ma papatiso atu i le suafa o le Ali'i. O ma tala'i atu le upu a le Atua i tulu'iga o le lalolagi,” o lo'o talanoa mai i tagata uma e lē na o faife'au.

## GALUEGA ALE AU APOSETOLO (FA'AAUAU MAI LOMIGA TALU AI)

17: 1 – 15 Mai Tesalonia aga'i atu i Perea, ma se va'aiga filogia.

E ui na va'aia e Luka le misiona a Paulo i Tesalonia (nai selau maila i sisifo o Filipi) e pu'upu'u, tolu vaiaso, o le fa'apotopotoga sa ia fa'avaeina i'ina e taūa tele ua talia le ulua'i tusi na tusia e le Aposetolo, 1 Tesalonia.

O mea na tutupu o lo'o fa'amatalaina i se gagana ua fa'alogoina se leo ua o gatasi ma le Evagelia lona Tolu. Ina ua maitauina e Luka na au atu Paulo i le fa'apotopotoga a le Sunako e pei o lana “tu masani,” atonu o lo'o ia fa'asino i le faiga masani fa'amisionare a Paulo. Atonu o lo'o fa'apea mai fo'i na 'au atu Paulo i le Sunako e pei o lana tu masani Iutaia, e pei o Iesu na 'au atu i le sunako i Nasareta “o lana masani lea” (Luka 4: 16). O ana a'oa'oga i lenei fale o tatalo ma a'oa'oga ua fa'apuina i upu ua atagia mai ai le fe'au a Iesu i le au so'o i le Aso Sa o le Eseta (“Na tatau ona tigā o le Keriso, ma toe tu mai i e ua oti,” v. 3; va'ai Luka 24: 26, 46 – 47). Ma o latou o lo'o i le fa'apotopotoga Iutaia ua mauaina le fe'au a Paulo o se fa'amata'u ua tosoina i le fa'amasinoga nisi o le fa'apotopotoga la'ititi Kerisiano ua tuputupu a'e i le nofoaga o Iasona, o a latou tu'ua'iga ua toe fa'aleo mai ai e pei ona faia ia Iesu: Na matou iloa lenei tagata ua ia fa'asesē i le matou nu'u, ua vavao fo'i ona avatu o lafoga ia Kaisara, ua fa'apea mai, o ia lava o le tupu, o Keriso” (v.7; va'ai Luka 23: 2).

Onosefulu maila i saute i sisifo, o Paulo ma Sila ua maua se sunoka i Perea ua sili atu lona taliaina o i la'ua, le nofoaga ua feagai atu ai tagata ma le au misionare i le a'oa'oina o le mataupu fa'atusi pa'ia, ae le na o le Sapati ae i aso "ta'itasi" (v. 11). Ae o fili ma'elega mai Tesalonia ua taunu'u ma fa'atupu fa'alavelave ma una'ia le motu o tagata e tete'e atu ia i latou, e pei o faigamalaga a Paulo (Saulo) ae le'i avea ma Kerisiano na malaga mamao e taofia le salalau o mea ua ia manatu o ni a'oa'oga sesē Iutaia, "o le Ala" (Galuega 9: 2).

### 17: 16 – 34 Paulo i Atenai

I lenei vaega ua aumai e Luka le tautalaga e tasi na atoatoa lelei na avatu i se fa'apotpotoga o tagata o Nu'u 'ese. Sa ia fa'amatala lona aofia ma le fa'aeteete ina ua ia fa'ailoa le au Setoiko ma Epikuro i le fuaiupu 18 (o lo'o fa'ailoaina uma na o le Feagaiga Fou). O le fa'ailoaina o igoa ua toe manatua ai fa'atusa o tulaga fa'afilosofia e uiga i le tagata, natura, ma atua. Ua iloa e Setoiko le moni o se tu'u fa'atasia ole utulaulau fa'atulagaina o se fa'anoanoa tu'ufa'asolo o se ituaiiga o "Tulafono." O le tagata o se vaega o le utulaulau ma e maua le fiafiaga i le fa'atasi ma isi vaega ta'ua o le tulafono alofa a le utulaulau

O le au Epikuro i se isi itū, sa i ai se manatu o le lalolagi o se masini, le mea na fanau mai ai le mamana i se auala a se isi e "sili atu" ona ala (o le mamana na mafua ai le vateatea ae lē o a'afia ai). O Epikuro sa manatu na o se fa'aleagaina mulimuli mai le oti ma, i le taimi lea, saili se fiafiaga i le faia ma le fa'autauta ma le manaia. Ua tala fegai ai la mo Luka le fa'amatalaina le uiga o le motu o tagata ua fevaevaea'i. I se tasi itū, sa i ai i latou sa tauemu ia Paulo, ma fa'ate'a 'eseina o ia o se tagata e fatufatu leaga o se fa'auigaga ua fetau i le au Epikuro, o latou ia e talitonu o a'oa'oga a Paulo e fou ma e lē talafeagai ma a latou fo'i a'oa'oga. I se isi itū, sa i ai i latou na mua'i le mautonu (manatu o lo'o talanoa mai Paulo i ni atua fou, *Iēsous* ma *Anastasis* ("Toetu" ua sesē le fa'alogoia o le igoa a le pa'aga a *Iēsous*?) ae tumau pea le tatala atu i le o lo'o tala'i ma ua mana'o e fa'alogologo atili. Ma o lenei uiga sa talafeagai mo Setoiko, o lē o le a mauaina ni lolofi atu taufa'ase'e ma a latou manatu fa'alalolagi ma ituaiga o olaga, ma o le a tata'i atu i nisi o su'esu'ega.

O le manatu o le Atua e le o pu'epu'eina i malumu ma e le mana'omiaina faigatalosaga a le tagata (va'ai 7: 48) o le a talafeagai ia Setoiko

ma Epikuro. Ae i le tete'e atu i le mau a Setoiko e uiga i le i ai o le Atua i mea uma, na tulei mai e Paulo le manatu fa'atusi pa'ia o le na foafoa ma tomanatunatu ma faia mea uma ma, e le gata i lea, lagolago i mea uma lava. Ua fa'amanatu mai e Paulo ia i tatou le amataga masani a le aiga a tagata ("faia mai le tasi" – ua tutusa ma fa'amatalaga fa'atusi pa'ia i le amataga o Atamu ma fa'apea le amataga fou ma Noa). Fa'aleoina o lana folafolaga pu'upu'u i le au Lukaonia i Lusa, na toe faia e Paulo le Isaia 42: 5 ma vala'au i latou e mafaufau loloto i le 'ele'ele o se nofoaga mo le tagata ma se fa'aaliga o popolega a lē na Fofoaina.

Afai o Iesu o le a avea ma fa'amasino silisili o aiga fa'aletagata, o le a mulimulita'i faiga ua tatou fa'alogi i ai o ia a'oa'oina i le Evagelia lona Tolu, aemaise le lauga i luga o le mea laugatasi (Luka 6: 20 – 49).

O le au tusitusi ua maitauina ua fa'aalia mai o Paulo ua fa'aoga lona filisofia "fa'anatura telosia" i le taimi nei e tasi i le Galuega. Mai lana tasi muamua i Korinito, ua ia fa'ailoa mai le manatu e lē sau ia i latou ma le atamai o le au fai filosofia ae ua na o le "fa'avalevaley" a le Mesia fa'akoluseina. O le faiga na fa'aoga e Paulo i Atenai ua na o se faiga e le'i sologa lelei, e le tatau ona toe faia? Ua foliga mai ua va'aia e le ekalesia i lenei mea na tupu o se fa'ata'ita'iga pe fa'apefea ona talanoa atu Ierusalem i Atenai. O Tomasi Aquinas, mo se fa'ata'ita'iga, sa fa'aogaina vaega fa'afilosofia o le toe mauaina mai o Aristotle o lo'o tautala i ona aganu'u Europa. Ma o le telosia sa masani o se taumafaiga e toe fa'afo'i mea na aumai e le fa'aaliga i le gagan a se tasi i lona taimi ma le nofoaga. Ua mafai ona va'aia e se tasi lenei faiga matagofie pu'upu'u o le fa'avae mo le fa'atalanoaga i le va o talitonuga 'ese'ese ua lu'itauina ai i tatou i aso nei...*fa'auaau pea...*

## SAGATO KELEKOLIO O NYSSA



O Sagato Kelekolio o Nyssa na fanau i le 33 AD (Anno Domini tausaga a le Ali'i) i le 'a'ai o Kaesara i Cappadocia. O Kelekolio o le uso la'ititi a Sagato Basil le Ta'uta'ua. Fa'apea fo'i se fa'auō a Sagato Kelekolio o Nazianzen. Na a'oa'oina Kelekolio i Athens le 'a'ai a Eleni. Na a'afia o ia i galuega a Origen ma Plato. O Kelekolio na fa'aipoipo atu ia Theosebeia, e manatu na avea ma tiakono. O Kelekolio o se perofesa o tautalaga fa'atosiga lelei.

O lona fa'anoanoaga i lona olaga o se faia'oga na avea ai ma ositaulaga ma sē e nofo to'atasi O lona tinā ma lona tuafafine sa olaina le olaga fa'amonasari. Na avea o ia ma Epikopo o Nyssa, Armenia i Lalo i le 372 AD. Na avea fo'i o ia ma Akiepipoko o Sebaste. Sa finau atu i le mau ma a'oa'oga fa'apea o Keriso e lē tutusa ma le Atua, ae e le'i manuia lana taumafaiga pei ona fa'amoemoe i ai.

Na fa'a'ole'oleina ma fa'asesēina o ia na o'o lava i le tulaga na tu'ua'ia ai o ia e le kovana a Pontus o Demosthenes i le gaioi o mea totino a le Ekalesia ma fa'afalepuipui ai o ia. Na sola 'ese ma na fa'ate'aina o ia mai le tofi Epikopo e le sinoti a epikopo i le 376 AD. Sa fealaua'i solo i le fa'aaunu'ua mo le lua tausaga, ona toe fa'afoia ai lea i lona tofiga.

Sa 'au atu Kelekolio i le Fonotaga i Anitioka. Finau atu i a'oa'oga sesē Meletiano. Sa 'au atu i le Fonotaga fa'alelotu i Constantinople o se fai telosia.

Na finau atu Kelekolio i le mau o le tineia o le mamana o Keriso ma toe fa'amausalī poloa'iga a le Fonotaga i Naisia. Na ave iā ia le fa'aaloaloga a le fonotaga "Tamā o Tamā uma" ona sa fa'aaloaloga o ia o le Tamā sili a le Ekalesia.

O lo'o i ai sina finauga e uiga i le va feagai ai a Kelekolio ma lona to'alua i le mulimuli mai o lona fa'au'uina o lana tofi epikopo. E ui o nisi na fai mai sa fa'auau pea lona nofo ai fa'atasi ma le fafine, ae o Sagato Jerome na fai mai o le ekalesia i sasa'e e le fa'atagaina lenei faiga..

6

## Fa'amanatuina o le Papatisoga o le Ali'i

'O lo'o fetalai ane o ia i nei mea, a ua alaga tele mai ai le tasi fafine mai le motu o tagata, ua fa'apea mai iā te ia, "Amuia le manava na fanau mai ai oe, ma susu na e susu ai." A ua fetalai atu o ia, "E moni, ae sili ona manuia o e fa'alogo i le afioga a le Atua, ma tausii ai" (Luka 11: 27 – 28).

Ua uma ona tuli 'ese e Iesu le temonio ma ua fa'amaloloina le ali'i gugū ina ia mafai ona tautala ma vivi'i ile Ali'i. O latou le au fai tofi a le Ekalesia Iutaia ua tauemu ia Iesu, a o le va'aiga fa'atusa o se fafine maualalo mai le motu o tagata, ua tele lona fa'atuatua ma le fa'amemelo, ua vivi'i Iesu i lona vivi'i o lona tinā. Na talia e Iesu lenei fa'aaliga matagofie fa'aletagata ae e pei ona masani ai, fa'alolotoina lenei malamalama'aga i ai. E le'i mana'o e fa'aitiitia le tala a lona tina- i le fa'afeagai ai, sa ia fa'amamafaina se vaega e tasi o le mamalu moni o Maria, le tinā i le aiga fou a le Atua, o lē o lona tatala atu i le upu a le Atua o le tu'uto e ola ai le moni.

O faiga masani lenei ma fuafuaga uma a le evagelia a Sagato Luka e masani ona fa'asino so'o mai Maria o se fa'ata'ita'iga ole fa'atuatua. Sa ia fa'amanino lelei maia lenei i le taimi o le liu tino tagata (Fa'auta, o a'u lenei, le 'au'auna a le Ali'i'), i le Asiasiga (amu'ia o lē ua i ai le fa'atuatua e fa'ataunu'uina ai folafolaga a le Ali'i), i lona lē tautala ae o se tali tautalatala ile pese a agelu ma le fe'au a leoleo mamoe (na teu fa'a'oa e Maria nei mea uma ma mafaufau ai), ma fa'apea ai o se upu mulimuli, i le mea na tupu i le malumalu ina ua fa'aalia le vavae'ese mai o Iesu mai lona aiga fa'anatura (na teuina e lona tinā o nei mea uma i lona loto').

I le lauga i luga o le mauga, na a'oa'o atu Iesu ma le mamalu le tulaga 'ese o lona aiga fou: e lē lava

## Fa'amanatuina o le Papatisoga o le Ali'i

le ta'ua o se tasi o ona so'o; o lea e mana'omia o le tatala atu i le upu i le tulaga o le fa'alogo ma le tulaga o le tali atu. 'E le sao atu i le malo o le lagi i latou uma o e fai mai ia te au, Le Ali'i e, le Ali'i e; na o lē na te faia le finagalo a lo'u Tamā o i le lagi. O lenei, ai se fa'alogo i a'u upu nei, ma faia e ia, ou te fa'atusaina o ia i le tagata poto, ua na faia lona fale i luga o le papa' (Mataio 7: 21 – 24).

O le mea lea ua fa'aalia mai e Iesu iā i tatou le tulaga moni fa'atinā o Maria o se fa'ata'ita'iga o le Ekalesia, o lē e ola ai i upu uma e sau mai le fofoga o le Atua ma fa'anaunau e gaiio ai i ia upu.

O le lumana'i o le Fa'akerisiano e fa'amoemoe tele i fa'apotopotoga ta'itasi i le iloa ona patipatia le Eukalisitia, le fa'amanatuga o puapuaga, maliu ma le toetu a lo tatou Ali'i, o lona uiga o le sauniuni e ola ai e pei ona i ai lenei misitelio. Tatou te mautinoa lava le fautua a Maria pe afai ua tatou manana'o e a'oa'o mai iā te ia ma mulimulita'i i ana fa'ata'ita'iga. O ia o le tagata lelei atoatoa o le Eukalisitia, le fa'ata'ita'iga o manatu fa'afetai, o lē ua fa'amautinoa le amiotonu ia tatou taumauga i le malo o le Atua.

A tatou manana'o e avea i tatou ma sulii moni a le aiga fou ua fa'amautu i le fa'atuatua ia Keriso, ona tatau lea ona tatou a'oa'o loloto i faiga e iloa ai fa'aaloga o le afio ai o le Atua, le fa'alogo i lana upu: i le foafoaga atoa; i le tagata ola, o ni fa'atusa ma foliga o le Atua; i tagata pa'ia ma perofeta; ma i le fe'au matagofie a sakalameta – e masani ona fa'amoemoe i le kalasia a le Agaga Pa'ia e fesoasoani iā i tatou e malamalama i le fe'au ma le finagalo o le Atua. Fa'atasi ai ma le Taupou o Maria, o le a tatou metitasio i aso ta'itasi i le upu; o le a tatou avatu la tatou va'ai atoatoa i le misitelio a le Ekalesia ina ia malamalama lelei ai i le fe'au atoatoa a Keriso. Ae ui i lea, o le fatu o le mataupu e masani o mea ua a'oa'oina mai e Maria iā i tatou: 'O se mea lava e fai mai ai o ia iā te outou, ia outou faia'.

O le mamalu ma le vi'iga iā te oe le Atua pa'ia;  
mo galuega uma na e talanoa mai ai iā i matou.

O mea uma ua avatu ai la matou va'ai i lou Alo e to'atasi,  
o lau upu mulimuli iā i matou,  
le fa'aaliga atoatoa o lou alofa ma lou finagalo.  
Auina mai iā i matou lou Agaga Pa'ia  
ina ia matou fa'alogo ai pea i lau upu  
ma le loto mamā,  
ma se mafua'aga maumaututū e faia e pei ona tatau ai.

Maria e, tatalo mo i matou  
ina ia aumai e le Ali'i iā i matou, e pei ona ia avatu iā te oe  
se manatu fa'afetai,  
ina ia matou a'oa'o i aso ta'itasi pe fa'apefea ona patipatia  
le Eukalisitia  
ma ola ai o matou olaga i se tali  
fa'afetai i mea alofa uma a le Atua.

Amene.



8







**O LE VAITAU O LE FAGAFULU**

I le ta’amilosaga o le Tausaga “A” o faitauga i aso Sa ua aumai iā i tatou ni evagelia tetele e tolu a Ioane ua fa’aoga mo le fa’atinoga o le Sauniga o le Fa’aulufaleina o Kerisiano Matutua. O nei evagelia e tolu o ni evagelia ua fa’aogā o ni fa’atusa po ni fa’ata’ita’iga mo a’oa’oga a le Ekalesia ma o le a mauaina mai ai pea le avanoa mo le au fa’atuatua e tomanatu ai i lo latou fa’atuatua. O ni fa’amatalaga loloto o le feiloa’iga a Iesu ma tagata ua o mai i le fa’atuatua – o le ta’uta’uina o le fa’atuatua a le faaine Samaria, le ali’i na fanau mai e tauaso ma le tuafafine a Lasalo ua latou tu’uina mai iā i tatou, o ni vala’aulia iā i latou ua fa’alogo ma manatunatu, ina ia latou fa’apea ona fa’aילוaina Iesu le Ali’i. O vaiaso e lua o le Fagafulu ua ofoina mai iā i tatou le fa’asologa masani o le Fagafulu o fa’asoosoga o Iesu i le toafa mulimuli mai ai le evagelia o le Liu Tino – fa’aילו mai ai itū moni fa’aletagata a Iesu, ma lona itū mamana moni, ma fa’amanatu mai ai iā i tatou le Misitelio Fa’apaseka ua tatou sauniuni atu e patipatia i lona atoaga i le Sauniga Afiafi o le Eseta o lona uiga ua “tatou o mai e fa’asoa i le mamana o Keriso na fa’amaulaloina o ia lava ina ia fa’asoa i o tatou tulaga fa’aletagata”

**Aso Sa 2 Fagafulu Aso 5 Mati.** Faitauga muamua Kenese 12: 1 – 4. Matua: Ua vala’auina Aperamo o le tupuga ia o le nu’u o le Atua.

SALAMO 33: 4 – 5 (tali), 18 – 19 (tali), 20, 22 (tali). Tali: Le Ali’i e, ia i luga iā te i matou lou alofa, e pei ona matou fa’amoemoe iā te oe.

Faitauga lona lua. 2 Timoteo 1: 8 – 10. Matua: O lē na fa’aola mai iā tei tatou, ma vala’au mai i le vala’au pa’ia.

**FUAIUPU MO LE EVAGELIA:**

O le si’ufofoga o le Tamā mai le ao ua fa’apea mai, o lo’u Atali’i pele lenā, ia outou fa’alogo iā te ia.

Evagelia – Mataio 17: 1 – 9. Matua: “Ua pupula mai ona fofoga e pei o le la”.

***Tofitofiga o le Upu:***

I se tasi o taimi na vala’auina ai e lo tatou Ali’i Peteru, Iakopo ma Ioane, le to’atolu o ana uō, e tu’ua popolega o aso uma o le olaga ma fa’atasi atu ma ia i luga ole mauga. A o fai tatalo i le tumutumu sa atagia mai ua si’i atoa atu o ia i se isi lalolagi. Ina ua toe maua le to’a filemū ma leai se vevesi sa si’osi’omia i latou e se āo ma iloa atu ai le mana ma le mamalu a lo latou ali’i. I se taimi vave na fa’afuase’ia na ave’esea ai le veli sa vavae’esea ai mea sa va’aia ma mea e lē va’aia ma sa latou pupuni o latou mata mai le susulu malosi o le mamalu o le Ali’i ua sulugia ai i latou. Ina ua fa’alogoina le leo o le Atua le Tamā mai le āo: ‘O lo’u Atali’i pele lenā, ia outou fa’alogo iā te ia,’ ua matata’u i latou ma ua fa’atumulia e le maofa ma le fa’aaloalo, na fa’apa’u’ū faō ai lea. Sau mai le mauga na fa’aילו atu e Iesu i ana uō o le auala aga’i i luma o le a ui atu ai i Kalevalio ma le koluse. O nei so’o e to’atolu o e sa molimauina Iesu i le mamalu o le a va’aia o ia i se taimi pu’upu’u ua fa’aitiitia i se tulaga o le vaivaiga fa’aletagata i taimi o ona mafatiaga i lenā po pagatia ua na o ia i le togala’au i Ketesemane. O le liua i luga o le mauga sa fuafuaina e fa’amalosia ai lo latou fa’atuatua ma le fa’amoemoe ma fa’amalosi’auina ai i latou e onosa’ia lenei mea ua aga’i atu i ai i le lumana’i.

O le tala o le liua o fofoga o Iesu o se fa’ata’ita’iga lelei o le malosi ma le fa’amautinoaina e mafai ona tatou maua mai i tatalo a o feagai atu ma faigatā. O le mafua’aga o le alu atu o Iesu i le mauga o le sa’ili lea o le ta’ita’iga mamana i tatalo lēleoa. Afai tatou te o ‘ese atu mai le olaina o le afa o tatou olaga, i le ufiufi o le pogisā, ma iloa ai fuafuaga a le Atua mo i tatou,

tatou te mana'omiaina ni taimi o le filemū, leai se pisa ma le to'afilemū ina ia lagona lelei ai le leo o le Atua. E masani ona tupu, o le tele ona tatou iloaina le Atua o le lelei fo'i lea ona tatou malamalama iā i tatou lava. O le uiga o tatalo o le fa'atasi ai ma le Atua, fa'alologo ia te ia ma iloaina lona malosi iā tatou gaioiga e ala ile olaga nei. Tatou te maua ai le fa'amalosi'au ma le mafanafana e fesoasoani mo tatou e fa'amausalī ai a o tatou faia ni malagasā mai o tatou talavou aga'i atu i le matutua e i ai se mafua'aga ma se i'uga e va'ai atu i ai, o lo'o vala'au mai le Atua iā i tatou e o atu. Atonu e lē o vala'auina i tatou i ni nofoaga e lē o mailoa e pei ona vala'auina ai Aperā'amo, ae ua amia i tatou ta'ito'atasi e fa'atuatuaina o ia a o tatou feiloa'i atu i lu'itau o aso ta'itasi o le olaga.

O tatalo e fesoasoani iā i tatou e va'ai atu e ala i mata o le Atua. E ui e lē ave'esea ai o tatou fa'afitauli ae fesoasoani iā i tatou e feagai atu i ai ma le loto tele. O lo'o tatou savalia le ala aga'i atu i Kalevalio ma o lo'o tofotofoina pea i tatou e fa'amasinoga ma tigā ma mafatiaga i le ala. Ua folafola mai e Keriso se lumana'i fa'alelagi iā i latou uma ua fuafua e fa'asoa le faigatā i lona faigamalaga. E mafai ona avea i tatou ma so'o moni i le fa'asoa o lo tatou fa'atuatua ma fesoasoani i isi e faia le malaga ma i tatou. Ua fa'amalosi'au le Atua i isi e ala mai iā i tatou – e lē o ni auala misitelio ae o upu a le tagata ma amioga agalelei ua tatou fa'aali atu iā i latou. I lenei auala o le mamalu o le Ali'i ua susulu e ala i o tatou olaga ma fa'apupula ai i tatou a o tatou liua i le fa'atasa o le tasi ua tatou fa'ailoa atu.

### **ASO SA 3 FAGAFULU ASO 12 MATI.**

Faitauga muamua – Esoto 17: 3 – 7. Matua: Aumai ia se vai iā te i matou, matou te inu ai.

SALAMO 95: 1 – 2 (tali), 6 – 7 (tali), 8 – 9 (tali). Tali: O le aso nei afai tou te fa'alogo ai i lona siufofoga, 'aua ne'i fa'ama'a'a o outou loto.

Faitauga lona lua – Roma 5: 1 – 2, 5 – 8. Matua: Ua fa'amaligi mai le alofa ole Atua i o tatou loto e le Agaga Pa'ia ua foaina mai iā te i tatou.

FUAIUPU MO LE EVAGELIA:

Le Ali'i e, e moni lava, o oe o le Fa'aola o le lalolagi; aumai iā te a'u le vai ola, ina ia ou lē toe fia inu.

Evagelia – Ioane 4: 5 – 42. Matua: O le vai ou te avatua e avea o le vai puna, e puna i luga i le ola fa'avavau.

#### ***Tofitofiga o le Upu:***

O se va'aiga fa'aletagata ua tusia nei e le feiloa'iga a Iesu ma le fafine Samaria i le vai 'eli. I le vaivai ma le lēlavā i le savali mai se mea mamao i le lā ma le vevela, sa nofo ifo i lalo ma le amana'ia tu masani Iutaia i le talosaga atu i le fafine mo se vai e fa'amalie ai lona galala. E leai se Iutaia e talanoa i se Samaria ona o ni fetaua'iga ma ni 'ese'ese mai seneturi e tele ua tuana'i o lo'o fa'aauau pea e augatupulaga le fe'itaga'i. O le fia inu e lē iloa se tuā'oi ma na faia se talanoaga, ma o le fafine, na talitonu ia Iesu, na fa'ate'ia ina ua fa'alogo atu e mafai ona ia aumai iā te ia le vai e tumau e fa'avavau. Sa fa'anaunau lava ina ia 'aua ne'i fa'amāasiasia o ia i le lē amana'iaina i le vai 'eli e ona tuā'oi o ē inoino iā te ia ona o le ituaiga o olaga ua ia uia. A o alulau le talanoaga na iloaina e le fafine o lana fa'afitauli e lē o le leai o se vai ae o se fia inu mai totonu e leai se vai fa'alalolagi nei e mafai ona fa'amalieina – o se fia inu na mafua ona o le leai o le Atua i lona olaga. E i ai se tala a le fafine Samaria e fia fa'amatala na tete'a ma ni

tane e to'alima ona e le'i maua ai sona fiafia. Na ta'ita'iina e Iesu o ia e va'ai loloto i lona olaga e tumu i fa'afitauli ma fesoasoani iā ia e fa'amāmā avega i lona agaga. E aunoa ma se leo o le tu'ua'iga sa ia talia lenei fafine, ma va'ai i mea sesē uma sa faia e lenei fafine, sa fa'amagalo o ia mai ana agasala. Sa avatu e Iesu i le fafine lona fa'amoemoe ma ofoina atu i ai le vai o le fa'auō ma le Agaga o le Atua na ta'ita'ia o ia i le ola e fa'avavau. O faitauga o le asō ua mata'itu i le vai ma le fia inu, ae o le ā tonu le uiga o le vai ma le fia inu i le faitauga a le evagelia? E le na o le vai e pei ona tatou iloaina o lo'o talanoa mai ai Iesu, ae o le alofa lavea'i a le Atua o lo'o sasa'a mai i o tatou loto ua mafai ai ona tatou mauaina le ola ma le filemū. O le fia inu o le leai lea o le Atua i o tatou olaga – le fa'anaunau lē fa'amalieina i loto o le tagata. O lo'o talanoa mai Sagato Aukusitino e uiga "i o tatou loto e lē malolō lelei se'ia latou maua la latou malologa i le Atua." Ona o le āluga lelei o le olaga e le'i fa'amalieina ai le agaga fia inu o le agaga o le tagata, pau le fofō o se mafutaga ma Iesu o lē e aumaia le vai fa'amisitelio ua maua ai se olaga e puna – lelei i totonu o i tatou.

O le mea na a'oa'oina ai le fafine Samaria mai tane e to'alima, ua tatou a'oa'o mai mea sesē o le so'ona – fa'aloloto i mea inu, fuala'au fa'asaina, fai ta'aga ma ta'aloga faitupe. O lona liliuga ua aumai ai ia i tatou se fa'amomeoe tele i na tulaga fa'aletagata o se olaga e talafeagai ua silia lea mo ia. Ae o lona taimi ua tuana'i e le'i taofiofia ai o ia e fa'alatalata atu ia Keriso. Na mafai e Iesu ona aumai o ia i le ta'ita'i lemū mai o ia mai lona tagata tuai ma si'i atu lona mafaufau ma lona loto i mea maualuluga. I le vai eli a Iakopo o se ali'i, i le talosga atu mose vai e inu ai, na fa'afo'ia maia le tamali'i'aga ale fafine ma suia lona olaga. Ina ua papatisoina i tatou na tatou talia lenei vai lavea'i o le ola mo le ulua'i taimi. Ua na o se amataga fa'atauva'a ua totōina ai i tatou, e pei o se fatu, i le togala'au a le Atua. A o fa'asolosolo i luma le olaga e mana'omia ona tatou feso'ota'i pea ma lenei vai 'eli o le ola ua aumai e Iesu ia i tatou – a leai o le a tatou mimini ma mamago ma o le vavega o le ola i le amio atua o le a lē tupu. O le asō ua talosaga mai Iesu ia i tatou e va'ai pe fa'apefea ona tatou ola ai o tatou papatisoga. Afai ua tatou puapuaga mai le fia inu o lona agaga o le i ai pea e fa'afouina ma ta'ita'ia i tatou iā tatou sa'iliiliga mo le fa'avavau e lē uma ma lē suia.

### **ASO SA 4 FAGAFULU ASO 19 MATI.**

Faitauga muamua – 1 Samuelu 16: 1, 6 – 7, 10 – 13. Matua: Ua fa'au'uina Tavita ma tupu o Isaraelu. SALAMO 23: 1 – 3 (tali), 4 (tali), 5 (tali), 6 (tali) Tali: O le Ali'i, o lo'u leoleo mamoe o ia; e leai se mea ou te mativa ai.

Faitauga lona lua – Efeso 5: 8 – 14. Matua: Tulai mai ia mai i e ua oti, ona fa'amalamalama mai lea o Keriso ia te oe.

FUAIUPU MO LE EVAGELIA:

Ua fetalai mai Iesu, o a'u nei o le malamalama o le lalolagi; o lē mulimuli mai iā te a'u e iā te ia le malamalama o le ola.

Evagelia – Ioane 9: 1 – 41. Matua: Ua alu o ia, ua mulumulu, ua toe fo'i mai, ua va'ai.

#### ***Tofitofiga o le Upu:***

O le sini autū o le tauaso ma le malamalama o le autū lea o le Fagafulu ma ua fa'ailoa mai e faitauga o le asō. Na lapata'ia e le Atua Samuelu e fa'aoga ona lagona fa'aperofeta ae 'aua ne'i fa'avaleaina i mea ua tosiga i ai le va'ai: le matagofie o mea ua va'aia, le maualuga ma le malosi. O filifiliga a le Atua ua tu'u atu lea i le vaivai ma le lē taūa. Ua folafolaina mai e le salamo le malamalama ma le fa'amafanafanaga e o'o lava i le vanu o le pogisā. I Evagelia aga'i atu i le Pasio ua feagai atu Iesu

ma le pogisā o le masalosalo, le lē mautonu ma le fa'amauualuga fa'atalitonuga, le mea o lo'o fa'atusatusa ai le fa'amalieina fa'atauva'a o latou o lo'o u'uina le pule ma le sa'iliga taumafai a le au tauaso, o pipili ma latou ua leai ni aiga. Ua aumai e Iesu ni fa'ailoga e le taumate ma faiga fa'alalonei e le'i fa'agae'etia ai i latou o lo'o sa'ili le pule. Ae ofo ai o le ali'i tauaso na va'aia le perofeta o Iesu ona sa ia fa'anaunau e talia a'afiaga o lona i ai e ui o va'aiga e lē talitonuina. Atonu ua ia a'oa'oina mai, i lona tausō o isi fa'alogo'aga e sili atu le talitonuina. O se tasi nei o tala mai le anoanoa'i o tala a le Tusi Pa'ia ua lapata'ia i tatou e fa'aeteete i le fa'aogaina o le pule fa'alelotu po le tomā o se nofoa e aumai ai ni fa'ai'uga po ni fa'amasinoga o latou ua i le tau fa'asi'usi'u po le au fa'aanu'ua. O se tasi nei o uiga fa'atosiga i le tele o vaega fa'alelotu, a'afia ai ma Ekalesia Kerisiano. Afai o tatou agasala, ta'ito'atasi po fa'apotopotoga fa'alelotu ma isi, e mafai ona avea ma avega matagā ma se faigatā mo i latou i tua atu o le fa'atuatua, e mafai ona avea ma ni uiga ua iloaina o ni uiga fa'atauva'a, fa'amauualuga ma le fa'amasino. O le vevesi ma finauga o lo'o ta'oto i le va o le u'umau i mea e moni ma tutusa ma tulaga fa'atāuaina a le Evagelia, ma fa'aoga a'oa'oga a Kerisiano o se to'oto'o e sasa ai le au le fa'atuatua ma le au agasala. Afai o le sini o nei faitauga o le fa'atuatua, o lo'o i ai fo'i se lu'itau e mulimuli mai faiga masani fa'apea a'oa'oga a Iesu, o lē na fa'atinoa galuega lelei a le Atua o lē e i ai le mana e fa'amagaloa agasala ma o lo'o fa'aali mai i vaivaiga a le tagata.

### **ASO SA 5 FAGAFULU ASO 26 MATI.**

Faitauga muamua – Esekielu 37: 12 – 14. Matua: Ou te tu'uina atu lo'u Agaga i totou iā te outou, e ola ai fo'i outou.

SALAMO 130: 1 – 2 (tali), 3 – 4 (tali), 5 – 6 (tali), 7 – 8 (tali). Tali: O i le Ali'i le alofa; o iā te ia fo'i le fa'aolataga tele.

Faitauga lona lua – Roma 8: 8 – 11. Matua: Afai e nofo i totonu iā te outou le Agaga o lē na toe fa'atu mai iā Iesu nai e ua oti, e fa'aola mai fo'i o outou auga vale.

FUAIUPU MO LE EVAGELIA: Ua fetalai mai le Ali'i, o a'u nei o lē toe tu mai le ola; o lē fa'atu-tua mai iā te a'u, e lē oti lava ia e o'o i le fa'avavau.

EVAGELIA – Ioane 11: 1 – 45. Matua: O a'u nei o le toe tu ma le ola.

#### ***Tofitofiga o le Upu:***

Mo ni mafua'aga lelei o Katoliko ua masani i le ta'uta'u o le fa'atuatua maoa'e a Peteru i Kaisara Filipi (Mataio 16: 16), ae i le evagelia o le asō ua tatou maua se ta'uta'uina o le fa'atuatua uiga tutusa mai laugutu a Mareta 'O 'oe o le Keriso le Alo o le Atua, o lē maliu mai i le lalolagi.' Ma o lenei fa'ailoga na sau ae le'i i ai nisi fa'ailoga, ae le'i toe fa'atuina mai Lasalo mai le oti. E pei o le tele ona i ai isi fa'amatalaga a le evagelia a Ioane, o le feiloa'iga i le va o Iesu ma tagata e ta'ua, o le fa'amatalaga o a latou tauiviga ina ia malamalama ma i'u ai ona o mai i le fa'atuatua ua fausia ai le tala moni. O le fa'atuina o Lasalo ua na o se vaega la'ititi o le evagelia umi ua ofoina mai i le asō: o le talanoaga ma le au so'o, ma le feiloa'iga ma Mareta ma lona uso o Maria ma la upu mai le tele o lenei faitauga. O le mea o lo'o mata'itū i ai Peteru e lē o Iesu le fai vavega, ae o Iesu o lē ua sau i lenei lalolagi e aumai tagata i le fa'atuatua iā te ia o le Alo. O le galuega lenā o lo'o tau'ave pea e le Ekalesia e ala i ana tala'iga ma sauniga. 'Ua ou vala'uina Kerisiano uma, i so'o se nofoaga, i lenei lava taimi, e feiloa'i fa'aletagata fa'afouina ma Keriso, po se tatala atu ina ia mafai e ia ona feiloa'i atu ia i latou; ou te talosagaina outou uma ina ia faia lenei ma le lē taulau i aso ta'itasi' (Pope Faranisisi EG 3).



## FAITAUGA MO LE ASO SA MUAMUA ASO 2 APERILA

### ASO SA LAUPAMA

Faitauga muamua – Isaia 50: 4 – 7.

Matua: Ou te le'i ufiufi ou mata i le mā ma le feanu.

SALAMO 22: 7 – 8 (tali), 16 – 17 (tali), 18 – 19 (tali), 22 – 23 (tali). Tali: Lo'u Atua e, lo'u Atua e, se a ea le mea ua e tu'ulafoa'i mai ai iā te a'u?

Faitauga lona lua – Filipi 2: 6 – 11. Matua: Ua fa'amaulalo o ia e ia lava; o le mea lava ua matuā fa'aeaina ai o ia e le Atua.

EVAGELIA – Mataio 26:14 – 27, 66. Matua: Ia manuia le afio mai i le suafa o le Ali'i.

<b>Aso Sa muamua</b>	09.00am	Seatoun	Patele Maleko
<b>5 Mati 2023</b>	11.00am	Titahi Bay	Patele Peter
	11.00am	Porirua	Patele Andrew
<b>Aso Sa Lua</b>			
<b>12 Mati 2023</b>	12.00	<b>Te Awakairangi – Lower Hutt</b> (Taita & Naenae)	Patele Maleko
<b>Aso Sa Tolu</b>			
<b>19 Mati 2023</b>	11.00am.	Newtown	Patele Peter
	11.00am	Holy Family	Patele Andrew
<b>Aso Sa Fa</b>			
<b>26 Mati 2023</b>	09.30am	<b>Te Wairua Tapu – Petone</b> (Wainuiomata & Petone)	Patele Andrew/Peter
	11.30am	Stokes Valley	Patele Maleko

14



Mikaele Teofilo:



m.teofilo@wn.catholic.org.nz



+64 4 496 1707



021 0818 5037



PO Box 1937, Wellington 6140, New Zealand